



# Synfocity = 523

mail us at : [mzsynfo@gmail.com](mailto:mzsynfo@gmail.com); [mizoramsynod@gmail.com](mailto:mizoramsynod@gmail.com) - Phone - 2314648

12<sup>th</sup> February, 2015

## □ Private Ward 'Pi Pui In' hawn a ni

Nimin (Feb. 11, 2015) chawhma dar 10:00 khan Synod Hospital, Durtlang-a private ward sak thar 'Pi Pui In' chu Synod Moderator Rev. Lalrinmawian Pathian hnenah hlanin a hawng.

He private ward thar hi Missionary Doctor, Dr. G.P. Roberts (Pi Puii) hming chawin 'Pi Pui In' tih a ni.

Hawna inkhawm hi Pi Pui In, Meeting Hall-ah neih a ni a, Hospital Director Dr. Vanlalruatan report a pe a, Synod Moderator Rev. Lalrinmawian Pathian hnenah hlanin a hawng a, thuchah a sawi nghal baw. Rev. Lalramliana Pachuau, Executive Secretary-in malsawmnain inkhawm a tin a ni.

Hospital Consultative Body Meeting chuan Pi Pui In hawn hun atan Synod Hospital Board thut ni (Feb. 11, 2015) hi a ruat a, Hospital Board Meeting pawh Synod Office a thu lovin Pi Pui in hawna neih zawhah hian neih zui nghal a ni. Private Ward Building sak thar chungchang hi kum 2002 vel atang tawh khan sawi leh ruahman chhin tawh a ni a, engemaw chen hmalakna pawh kalpui tawh a ni. Kum 2008 Synod Inkhawmpuiin Private Ward thar sak rawtna a remtih avangin hma lak chhoh tak tak a ni ta a ni.

A sak hna hi Plan & Estimate siamtu, Architect-te enpuiin Departmental-a kalpui a ni a. Kum 2009 - 2010 atangin Budget-ah kum tin Rs. 50,00,000/- vel dahin zawi zawin hmalak chhoh a ni. A chung (Top floor)-ah hian damlo awmna tur Private Room 16 siam a ni a, chumi zinga Room 3 chu Deluxe Room a ni. A hnuai Ground Floor-ah hian Private Room 11, Deluxe Room 3 leh Dialysis Room 2 a awm thung. Damlo awmna tur room awm zawng zawng hi 32 a ni. A chung Top Floor-ah hian Meeting Hall - mi 30/40 leng dah tel a ni baw.

Building pumpui hi Private Ward bakah a hnuai First Basement-ah hian Eye Unit - OPD Complex, Operation Room leh Eye Ward tur a awm dawn a, Private Room 2 dah tel a ni baw. Chumi hnuai Second Basement hi Record Unit awmna tur a ni a, kumin kum tawp lamah chuan zawh fel vek theih beisei a ni a, sak chhunzawm mek zel a ni. He building sak nan hian sum senral tawh zat chu Rs. 2,85,50,200/- a ni a, Rs. 1,72,29,743/- mamawh a la ni.

Tunah hian hawn theiha sak zawh tawh a ni na a, room chhunga dah tur damlo khum leh mamawh chi hrang hrang neih loh a la tam a, sum engemawzat chu mi inphalte (Kohhran, Pawl leh mimal) hnen atangin hmuh tawh a ni a, hengte hmang hian bungrua engemawzat chah thleng tawhin hmanraw hlui nen tangkawpin tunah hian damlote mamawhna avangin room thenkhat hi luah tan tawh a ni.

## □ Ramthar Board Committee vawi 151-na thu

February 10, 2015 (Thawhlehi) chawhma dar 10 khan Synod Office-a JM Loyd Hall-ah Synod Ramthar Board chu a vawi 151-na atan a thu. Meeting hi Rev. Lalrinmawia, Synod Moderator-in a kaihuai a, tun tumah hian thu pawimawh ngaihtuah tur tarlan sa 13 zet an nei.

Thu ngaihtuah zingah hian Pathian Biak Inkhawm hruaina bu Chakma tawnga lehlin te, Hindi Congregation neih chungchang te, Missionary lak tur screening neih te, Meitei Kristian Fellowship Mission Board kuta pek te, School of Discipleship nena thawh ho thu te chu a langsar zual an ni.

Mission Board Secretary Rev. Lalchuanmawian report pein October 2014 chhungin Damparengpuih Bru Convention hlawhtling tak neih a nih thu tar langin inkhawm chhimtu mi 2300 zet an awm thu a tar lang a. November 2014 chhungin Home Mission North huam chhunga missionary-te pualin Retreat hlawk tak neih a nih thu te, November 2014 chhung veka Chhim Bial huapa Masihi Sangati Convention hlawhtling tak hman a nih thu te a tar lang baw.

## □ Finance Committee vawi 112-na a thu

Vawin (Feb. 12, 2015) chawhma dar 10:00 khan Synod Office-a J.M. Lloyd Hall-ah Synod Finance Committee vawi 112-na a thu a, member 41 an kal. Committee hi Rev. Lalrinmawia, Synod Moderator-in a kaihuai a ni.

Thu ngaihtuah zingah hian Synod Reserve Fund leh Ramthar Reserve Fund-a sum dah chungchang leh Synod Grant dilna te chu a langsar zual an ni a. Chartered Accountant chungchang sawi hovin Finance Officer's Reports thlir ho a ni baw.

Finance Secretary Reports-in a tarlan danin Kum 2014-15 atana Additional Budget dilnate chu SEC-in a pawm a, kum 2015-16 Synod Budget ruahman chu Synod-in a pawm fel baw a, Synod Inkhawmpuiin Auditor atana a ruatte inhmukhawm ni atan March 13, 2015 (Zirtawpni) chawhnu dar 1:00 ruat a nih bakah Aizawl khawpui bak khawpui dang lian deuh deuh 15 thlan chhuahah Finance Campaign neih tum a ni baw.

April 2014 atanga January 2015 thla tawp thlengin Pastoral Budget hmuh tawh chu za zela 74.77 a ni a, Mission Budget hmuh tawh chu za zela 76.78 niin za zela chhutin a vaia hmuh tawh chu 75.63 a ni.

## □ Mizoram Presbyterian Kohhran Hmeichhe Inkhawmpui Lian inbuatsaihna enpui

Nimin (Feb. 11, 2015) khan Mizoram Synod Kohhran Hmeichhe Khawmpui Lian vawi 56-na thlengtu tur Mamit Organising Committee te hmalakna enpuiin Inkhawmpui lian Chairman Pi C. Lalhmangaihi, Vice-Chairman Pi Rochuangkimi, Gen. Secretary H. Lalpianthangi, Treasurer Pi C. Lalneihthangi leh Fin. Secretary Pi Vanlalruangi te Mamit-ah an kal. Organising Committee nen Pandal sakna hmun GSA Playground-ah hma lak dan tur te sawi hoin inkawmna hun te an hmang nghal a, tawngtairual na hun hman nghal a ni baw.

Hmeichhe Inkhawmpui Lian vawi 56-na hi March 6 - 8, 2015 chhungin Mamit GSA Play Ground-a neih tur a ni a, Thupuih 'I nunna turin tlan chhuak rawh' (Gen. 19:17) tih hman a ni ang a, Speaker atan Rev. Vanlalzuata an hmang ang.

Pandal sak hna hi February 1, 2015 atang khan tan a ni a, February 15, 2015 hmaa sak zawh hman tum a ni. Tunah hian a chung an khuh mek a. Pandal sak hna hi Rs. 11,790,00/- in contract-a thawh a ni. Pandal hi mi 7000 leng tura duan a ni a, a zau zawng hi a dung 200ft. niin a vang 170ft. a ni.

## □ Zin

- ◆ February 14 - 16, 2015 hian Champhai leh Kolasib Bial chhung Kohhran hrang hrangah Finance Campaign neih a ni dawn a, hemi neihpui tur hian Kolasib-ah Rev. Lalzuithanga, Senior Executive Secretary; Rev. P.C. Pachhunga, Executive Secretary; Rev. B. Sangthanga, Synod Secretary; Rev. H. Remthanga, Upa Laldinpuia, Upa R. Rozama leh Upa R. Zirokunga te an kal ang a, Champhaih Rev. Lalramliana Pachuau, Executive Secretary; Rev. Dr. R. Lalbiakmawia, Finance Officer; Rev. C. Rosiama, Rev. Lalsangbera, Upa Lalremthanga, Upa P.C. Lalrinmawia leh Upa Lalbiakmawia Khiangte te an kal thung ang.

- ◆ February 13 - 16, 2015 hian Bukpui Bial huapin Bukpui Kohhranah Account Training leh Finance Campaign neih a ni dawn a, hemi neihpui tur hian Tv. Zaihmingthanga Fanai, Accountant; Upa Vanlalsawma Siakeng, Office Assistant leh Tv. Vanlalhriata, Office Assistant te an kal ang.

Contd...

- ♦ February 14, 2015 (Inrinni) hian Thingdawl Kohhranah Worship Seminar neih a ni dawn a, hemi neihpui tur hian Rev. P.C. Pachhunga, Executive Secretary leh Rev. Dr. C. Lalhlira, ATC Principal te an kal ang.
- **Pro. Pastor Orientation**  
February 10, 2015 atang khan Mizoram Synod hnuai Pro. Pastor lak tharte puala Orientation training chu Synod Conference Centre, Mission Vengah neih mek a ni a, Pro. Pastor 26 an tel a ni. Training hian February 14, 2015 thleng a aw h ang.  
Training-ah hian rawngbawlina kawnga tangkai tur thil chi hrang hrang zirtir an ni a, Resource Person-te chu Rev. Lalzuithanga, Rev. Lalramliana Pachuau, Rev. P.C. Pachhunga, Rev. B. Sangthanga, Rev. Dr. R. Lalbiakmawia, Rev. Lalchhuanmawia, Rev. H. Lalrinmawia, Rev. H. Remthanga, Rev. C. Rosiama, Upa H. Ronghaka, Upa Vanengmawia leh Dr. Robert S. Halliday te an ni.
- **Synod Mission Baord**  
February 18 & 19, 2015 hian Devotion Hall, Synod Office-ah **Interserve India Second Partnership Council Meeting cum Consultation** neih a ni dawn a, Mr. John Amalraj, Executive Secretary, Interserve leh Mr. Binu Varghese, Head of partnerships & networking with churches and organizations te an lo kal ang.  
February 18, 2015 (Nilaini) chawhma dar 10:30 atangin Council Meeting neih a ni ang a, Synod Mission Board, Baptist Church of Mizoram, Nagaland Baptist Church Council, CBCNEI leh ECCI - Churachandpur te atangin member 3 theuh tel tura beisei an ni. February 19, 2015 (Ningani) hian Rawngbawlina kawnga thawhho dan tur inrawnkhawmna (consultation) neih a ni ang a, Mizoram Synod aiawh 20, Baptist Church of Mizoram aiawh 10, UPC (North East) aiawh 10 leh UPC (Mizoram) aiawh 10 tel tura tih an ni.  
Interserve hruaitute hi February 20, 2015 (Zirtawpni) hian Board Executive Committee-te nen inkawmhona an nei ang a, February 22, 2015 (Pathianni) hian Ramhlun North, Mission Vengthlang leh Zarkawt Kohhran te tlawh turin ruahmanna siam a ni bawk.
- **MSSU**
  - ♦ February 13 - 15, 2015 hian Khawhai North Bial huapin Khawhai North Kohhranah Sunday School Zirtirtu Training neih a ni dawn a, hemi neihpui tur hian T.Upa Lalthahluna Ralte, MSSU Asst. Coordinator leh Upa K. Vanlalnghaka, Ramhlun East (MSSU Trainer) te an kal ang.
  - ♦ February 13 - 15, 2015 hian Vangthlang Kohhranah Sunday School Zirtirtu Training neih a ni dawn a, hemi neihpui tur hian Upa K. Zoremsanga, Kulikawn leh Upa S. Kapzathanga, Armed Veng South (MSSU Trainers) te an kal ang.
  - ♦ February 14, 2015 hian Aizawl Kohhranah Sunday School Zirtirtu Training neih a ni dawn a, hemi neihpui tur hian Pu John Lalhruaitluanga, MSSU Asst. Coordinator; Upa Lalhmachhuana, Tuikual North leh T.Upa F. Lalenghluna, Ramhlun Vengthar (MSSU Trainers) te an kal ang.
- **Social Front**  
February 13, 2015 (Zirtawpni) hian Lungpho Kohhranah Intodelh Seminar neih a ni dawn a, hemi neihpui tur hian Upa Zothanmawia, Office Assistant; Dr. Saithantluanga leh Upa Thangdailova (Campaigners) te an kal ang.
- **Mizoram People Forum**
  - ♦ February 13, 2015 (Zirtawpni) chawhnu dar 1:00 hian Mizoram People Forum leh Political Party aiawhten Thawhhona Thuthlung siamtha-in Synod Committee Room No. 1-ah meeting an nei ang.
  - ♦ February 14, 2015 hian nilengin Synod Conference Centre-ah Aizawl Khawpui chung MPF Local Forum hruaitute pualin Sawrkar Inrelbawlina Tha (Good Governance) tih thupui hmangin Seminar buatsaih a ni ang.
- **Hruaina Eng FM Radio & TV Programme**
  - ♦ **FEBRUARY 13 (FM ZOAWI AIZAWL @ 7:30 P.M.)**  
**Solo** : Vanlalmalsawmkima - Ka ngai che Lalpa, **Choir** : Mizo Cardinal Choir - Hrehawmna leh buaina piah saw, **Thuchah** : Upa Bonny Lalrindika - Tunlai thil awmzia (Then 2-na), **Solo** : Temi - Kraws thu, **Choir** : Besy Choir - Aw Lal Pathian i kut chhuak thilsiam tinreng, **Group** : One In Christ - I Pathian tawk turin in peih rawh
  - ♦ **FEBRUARY 13 (FM LUNGLEI @ 7:30 P.M.)**  
**Solo** : Vanlalmalsawmkima - Ka ngai che Lalpa, **Choir** : Mizo Cardinal Choir - Hrehawmna leh buaina piah saw, **Thuchah** : Upa Bonny Lalrindika - Tunlai thil awmzia (Then 2-na), **Solo** : Temi - Kraws thu, **Choir** : Besy Choir - Aw Lal Pathian i kut chhuak thilsiam tinreng, **Group** : One In Christ - I Pathian tawk turin in peih rawh
  - ♦ **February 15 (Tv Programme) @ 3:00 p.m.) :**  
**Bihchianna** : Bial KTP Conference 2015, **Playback** : Kulikawn East Kohhran Biak In Lungphum
- **Susamachar Prasaran Programme**
  - ♦ **February 15 (Pathianni) 5:00 pm. Hindi Gospel Programme (Susamachar Prasaran) :**  
**Group/Choir/Solo** : Republic Veng Masihi Sangati - Chalo mere sath, **Group/Choir/Solo** : Luangmual Vengthlang - Papi roope, **Sermon** : Rev Laltharzuala - Sansar se Prem na karo, **Group/Choir/Solo** : Zemabawk Bial Masihi Sangati - Jiboner Last, **Group/Choir/Solo** : Chanmari Masihi Sangati - Mukti Dilai
- **Moderator Programme**  
Synod Moderator Rev. Lalrinmawia chuan February 15, 2015 (Pathianni) hian Chanmari West Bial chung Kohhran te a tlawh ang a, February 16 - 20, 2015 chungin Manipur Area Committee, Churachandpur-ah a tel ang.

## KTP DAY 2015 CHUNGCHANGA HRIATTIRNA

KTP Day 2015 hman hun tur chungchangah Central KTP chuan zawhna tam tak a dawng a. KTP Day 2015 hi Synod Calendar-a tarlan angin February 22-ah hman tur a ni. Synod Inkhawmpui 2014 thurel Gen. 59-a "Kristian Thalai Pawl din kum tihchian thu"-a 'Kristian Thalai Pawl din kum chu kum 1954 February ni 16 a ni e, kan ti', tih kha a kum tihchianna (1953 or 1954) a ni a, February 16, 1954 hi Synod Standing Committee-in a KTP din a pawmpui (approve) ni a ni. Tuna KTP Day atana kan hman lai mek February ni 22 hi Synod Standing Committee-in a pawmpui hnuai a function tanna, meeting hmasa ber a niin a lang a. Khawzawl Venglai-a KTP General Conference (Feb. 23-26, 1989)-ah khan February ni 22 hi KTP Day atan hman ni se, tia rel a nih angin tun thlengin February ni 22 hi KTP Day atan hman chhunzawm a ni ta zel a ni.

**General Secretary**  
**Central Kristian Thalai Pawl**